

RIJEČ UREDNIKA

Eldan MUJANOVIĆ

Poštovani čitaoci,

u novom izdanju časopisa „*Kriminalističke teme*“ objavljujemo pet radova koji referiraju na različite sfere naučnog interesovanja, uključujući kriminologiju, kriminalistiku, istražnu psihologiju i sigurnosne studije. Uzimajući u obzir problematiku koju oslovljava svaki od pomenutih radova, evidentno je da se radi o vrlo aktuelnim i zanimljivim temama koje autori razmatraju na inovativan i sistematičan način, čime značajno proširuju i produbljuju spoznaje iz pomenutih naučnih oblasti. U strukturnom smislu, ovaj dvobroj sadržajno obuhvata dva izvorna naučna rada i dva pregledna naučna rada, te jedan stručni prikaz knjige.

Dvobroj započinje izvornim naučnim radom pod naslovom „*Obilježja počinitelja imovinskoga kriminaliteta u Kantonu Sarajevo*“, u kojem autori prezentiraju rezultate eksploratornog istraživanja koje se bavilo ispitivanjem razlika socijalnih i psihičkih obilježja kod recidivnih i nerecidivnih počinitelja krivičnih djela imovinskog kriminaliteta u Kantonu Sarajevo. Nadalje, izvorni naučni rad pod naslovom „*Prepoznavanje emocionalnih izraza lica i detekcija laganja*“ značajno doprinosi razumijevanju načina na koji detekcija i prepoznavanje emocionalnih izraza lica mogu poslužiti kao pomoć kriminalističkim istražiteljima prilikom otkrivanja laganja i procjene verbalnog, vokalnog i neverbalnog ponašanja osobe. Sljedeći rad pod naslovom „*Svijet u vihoru neizvjesnosti*“ implicira kritičko promišljanje o aktuelnim i kompleksnim pitanjima savremenog sigurnosnog ambijenta, uključujući i inovativne pristupe sagledavanju, analizi i rješavanju savremenih sigurnosnih problema. U konačnici, rad pod naslovom „*Uloga žena u terorizmu kroz prizmu teorije lijevog realizma i feminističke teorije*“ sa aspekta kriminoloških teorija razmatra fenomen terorizma kao jednu od globalnih sigurnosnih prijetnji današnjice, pri čemu je poseban akcenat stavljen na ulogu žena u terorističkim organizacijama.

Dodatno, sadržaj ovog dvobroja je obogaćen stručnim prikazom knjige pod naslovom „*Prošireno oduzimanje imovinske koristi pribavljene krivičnim djelima – teorijski, međunarodno-pravni i komparativno-pravni aspekti*“ u okviru kojeg autor iznosi svoje opservacije i utiske, te ovu naučnu publikaciju dodatno približava zainteresiranom dijelu naučne i stručne javnosti.

Na kraju se želim zahvaliti svim članovima Redakcije i recenzentima koji su izravno doprinijeli kvalitetu, pripremi i objavljivanju ovog izdanja „*Kriminalističkih tema*“.

Glavni i odgovorni urednik,
Dr sc. Eldan Mujanović